

雙

池

文

集

雙池文集卷之九

雜著 箴 銘 贊 跋 婺源汪紱稿

補天辨

傳曰女媧氏包羲之妹其工作亂與祝融戰不勝
頭觸不周山崩天柱折地輿缺女媧氏作煉五色
石以補之讀古者至今註之嗟乎何不經之甚乎
夫天何有於柱柱何可以一觸而折折何可煉石
而補此其無有而不足信也明甚何必深辨然自
典籍泯斲而後人得以肆其邪譖之說流俗遂因
而傳之一二大儒又或存而不論而後世術數怪

幻天堂地獄之說未必不緣此而生是無稽之譚其惑人不在異端下也雖然古人之爲是說者或亦其寓言焉曰天柱地輿蓋指兩間之綱常而言也曰五色石者卽五教也意者自包羲制夫婦之禮而綱常以正及包羲氏沒諸侯爭鬪亂其綱常無綱常是天柱折而地輿缺也女媧脩明五教而天下乃復定是則理之所應有而不誣者且古之稱功頌德者曰回天曰浴日矣天可回而日可浴哉亦不過喻言其功德之大耳而於補天之說又何詫焉其曰女媧氏包羲之妹者則因女字而誤

焉者也昔晉有馮婦燕有徐夫人唐有武五娘皆
男子之名也女媧氏而爲女子則馮婦徐夫人武
五娘其皆女子乎蓋女媧氏亦風姓之後而包羲
繼世之賢君也

通儒辨

夫所貴乎儒者謂其爲名教之所賴以植立人心
之所賴以維持道學之所賴以流傳民生之所賴
爲安養也是故夫人而謂之通儒是必其明於天
人之理達乎性命之原而異說之勢不足以眩其
志處則確乎有守於身出則沛乎有爲於世而利

害之介不足以動其心夫然後可謂之無所不通
夫然後可以當通儒之號而無愧今也不然依違
於邪正之途首鼠乎義利之際智限於凡愚而信
道不篤志流於卑近而執德不宏而徒以尋章摘
句以矜博洽之名與世浮沉而干衆人之譽此所
謂鄉愿之徒吾儒之賊而聖道不明人心久塞見
有同於流俗者則喜而親之見有異於流俗者則
訛而毀之而於是被俗子以通儒之號加通儒以
拘腐之名抑知夫投以大疑則摸稜而無所可否
怵以大難則震恐而不知所爲處困無所謂心亨

用之無所爲達道則何以謂之通而名儒也妄鳴呼今之世而無通儒歟今之世而有通儒是必其獨立不懼遯世而無悶者也而其誰知之其誰信之

相辨

或言於汪子曰吾甚惑乎世之言相者矣夫孔子貌似陽虎張良狀如婦人貴賤聖愚有性命焉於相何與汪子曰然乎子之言也不有鳳歟異於燕雀不有麀歟異於犬羊夫亦固有然矣是以芍藥芙蕖夫人而貴之相之貴也馬蘭苦蕒夫人而賤

之相之賤也虎似騶虞而仁暴分焉然騶虞之爲騶虞則必有別也蓋無輕言非相門人問曰相可憑歟曰不然德如伊尹何必鬚眉暴比項王空重瞳子且毋寧使人謂貌之不勝其人而反謂人之自囿於貌乎蔬植於圃佳而且腴相移於貴也蔬棄於野癯而且憊相移於賤也居移氣養移體富貴且然況居天下之廣居者

命辨

莫之爲而爲者機天地之生物也機而已耳命則人之所值乎機者然也是故一日之間一時之頃

天下之含氣而生者不知凡幾其間人物異類壽
夭貧富貴賤殊途其偶同者不以時日之同而同
其各異也不以時日之異而異何則天地以無心
而生物也是故髮則在首而毫則在腳口鼻任逸
而手足任勞吾何貴乎髮而賤乎毫勞手足而逸
口鼻歟吾身亦天地矣而不齊有若是者然則古
人之所謂命者其說何居曰天所賦爲命命亦因
人之有所受而借言之者也今夫謂天爲帝則以
命爲誥敕以所受之理爲職事以氣質爲府史胥
徒權力所挾以貧富貴賤爲祿秩厚薄有差以壽

死爲交代之期終事復命天若曰假爾事權與爾
徒衆錫爾祿秩以其厥職其與朕一德一心往盡
乃心無替朕命終事而歸則予以懌是則權力多
寡祿秩厚薄終事久近皆天之命而要之以職事
爲主不盡職而苟活謂之倖位之臣天將奪之勝
其任而愉快謂之忠勤之士天將予之理則然也
然而理御氣行氣以機動天則何心有理而已而
欲以所生之時日覘人之貧賤富貴壽殤也不已
惑歟曰富貴貧賤壽殤不以所生時日命歟曰朝
廷之推選也權力多寡祿秩厚薄職任久近亦以

時日異邪是故君子有立命之學焉則氣質之命
且有不言而富貴貧賤壽夭之數又何足以眩之
然則推命之說姑無論其無也就使有之亦非立
命君子之所宜過而問焉者也

形家辨

孤虛刑德之說自古有之而青囊家流則自郭璞
始青囊之術大抵依附於兵家陰陽形勢而夸大
其辭其後曾楊之徒乃日紛日雜亦日出而日岐
故言五行則有正體洪範六合雙山化氣斗首元
空遁甲之異言龍穴則或主於九星形體或主於

二十四山坐向六秀三奇或主於水法生旺墓絕而水法則又或分淨陰淨陽或主陰陽配合元通闕竅言尅擇則有諸家竅馬四利三元斗首六壬雷霆殺曜五運六氣遁甲奇門補山造命而天帝可使值日太陽可使差方此是彼非彼凶此吉怪誕支吾穿鑿牽強不可致詰夫以理言之則祖父子孫相聯一體祖父之體魄得其所安子孫亦以昌熾或有然者以人子之心言之則卜其宅兆而安厝之俾化者無使土侵膚於人子能不悽然然要以視生處高不爲路井窰竈不侵水蟻風寒斯

已而已而世道之漓人心之薄則不謂封墓爲掩
親之魄而必以親骨爲市富貴之資而於是停喪
不葬致有盜賊水火之虞買地爭山致有結訟破
家之患也又何足怪究之則或此葬而彼遷彼方
遷而此復葬吉凶茫無所驗禍福鮮有定憑不亦
異乎廬陵羅氏曰塞其途而制使勿入不若發其
藏而示之以無則試發其藏而言之三代以前未
有青囊之術故死者北首葬於北門之外不必二
十四山卦氣之有合也三日而殯三月而葬不必
時日干支之趨避也家人墓大夫掌之使人聚族

而葬不必五星形勢之爲區別也然而古之人享
國家天下者類千百歲官世祿爵吏長子孫是遵
何術哉迺自青囊說起而舉世之人旣莫不驚赴
神驚著蔡爲奉選日者經年而穀旦擇地者閱世
而佳城雖在無力之家慮無不延師卜吉奢望則
封拜科名儉之亦財丁富貴矣然而不皆得吉者
是其術之不工歟抑非求之可得歟以爲其術之
不工而多受其誤則已愚旣識非求之可得而顧
倖爲求則已妄且盡天下人而皆封拜科名財丁
富貴無不各如其願則亦無復有封拜科名財丁

富貴矣而又寧有是理哉兩山之間必有水焉水之所趨卽山脈之所赴離龍忌矣而丙又曰六秀自桂賀倣於衡廬自揭庾倣於林歷大抵皆離來未聞其皆貧敗寅甲忌矣而艮又曰六秀自岱西南以汶泗自黟歙西南以鄱陽大抵皆寅甲未聞其皆病風八曜忌矣而又曰非曜不顯黃泉忌矣而又曰救貧黃泉用奇門斗首則不能忌諸家雜殺用補山造命又不復合斗首雷霆是以葬而凶則曰八曜也葬而吉則曰非曜不顯也葬而害則曰黃泉也葬而利則曰黃泉救貧也或龍穴砂水

皆若合吉而不見福廕則又曰年月不利之故是其逃遁支離乃大抵若是若乃葬之已數十年不見福利而術家復爲遷葬掘之有見紫衣紫茄棺槨堅好則吉宜可知矣而又曰此廕尸之地不廕子孫者也夫爲子孫者能使祖考尸不速朽福孰大焉廕尸而不廕子孫是何說乎至若形像之間則尤有無足據者若席帽在唐爲公卿之服明則奴隸戴之明以烏紗爲仕者之帽而今則又不然貴賤其何常之有要之形家之不足信也今人非盡不知之願知之而究惑之則以福利薰心民無

定志故邪說得以搖之而愛親之心薄也江湖之
□間有水火葬者此又幾無人道至若有焚化親
屍以謀盜葬他人吉地者則其於王法又當何誅
焉福利之迷害人心有一至於是者然則如之何
而可曰導之以德齊之以禮以辨上下而定民志
復先王之制使殯葬皆有常期行周禮之法使冢
墓皆有常所出於禮則入於刑邪說庶不攻而自
熄歟

原卜

人非窮理之至於事不能無疑疑而不能決則不

能不稽之神神無可通乃託之卜筮此亦人心之所不能自己者也龜蓍有自然之象數而無雜感之心故聖人作之以紹天明而前民用連山歸藏不可考周易則文王周公因卦爻以繫之辭以定天下之吉凶成天下之亹亹然觀於大人之否不亂羣過涉之凶不可咎則吉凶有時而不問而要之以理爲歸所以示人以仁義中正之途知進退存亡而不失其正故穆姜非四德無以能隨南蒯非黃裳豈勝元吉不由其道而得吉非鬼神之所許也而豈效後世圖讖術數之學陰陽日者之術

徒以奇中爲神以不復衷之於理爲誣民而惑世
歟龜以象著蓍以數行故古人謂龜長筴短而左
傳所載占筮之文又多以己意雜時日爲占不獨
主於周易及孔子贊易發明文周之意而易始大
顯於天下至秦而後而龜卜之法漸廢後世易筴
以錢已非神物之興而漢儒徒求之數以不得聖
人作易之心乃於是倡爲納甲世應飛伏互體六
親六神諸說附會牽強以求一合而占易始流爲
術數之書以與吉凶消長之理進退存亡之道及
聖人憂患立教之心皆日離而日遠而或且以此

誣之孔子商瞿則已謬矣世教之衰日流日下而市井無賴遊食之徒乃敢託言卜易以誣褻聖經微獨義理之奧懵未及知卽象數之粗亦茫無所解甚而爻象且所未讀訓詁且所未通而反以掇拾仙佛餘涎依附神符鬼籙以簧眩乎愚夫愚婦末術之興日新月盛詭譎險虐大都不甚相遠則左道惑衆之誅宜不在僧道之流下嗟乎卜筮聖人所興而末流乃至是歟煉養可託之黃帝並耕可託之神農附會何所不可今之卜者而託之羲文似也此豈真聖人之過哉抑聖道之不明而橫

流得以肆其剽竊恆民之失業而異說得以廣爲招搖也古者卜筮占夢皆掌以太卜之官則藝有所宗而異術無所容其萌蘖此道德所以一而風俗所以同也歟

原祀

理勝分分勝恩恩勝諂諂則生姦分以止亂故事神之道非干之以諂而聯之以恩非聯之以恩而定之以分非定之以分而衷之以理也是故楚爲河崇晉爲實沈非不可諂以干之非其屬則情不通季旅泰山秦作五時非不可聯之以情也非其

分則勢相絕漢明之迎金人唐宗之祖元元非分之有所拘也非其理則害於道姦破恩恩破分諂於姦則薄於恩矣梁武麪爲犧牲而忍祖宗之不血食也姦破恩也一於恩則僭於分矣民庶祀及帝王而追享上逮於始祖也恩破分也定於分則下不亂自天子以至於庶人秩祀有常宗廟有數衣服有制牲醴有品絕地天之通明貴賤之等此分之所以止亂也衷於理則姦不作自郊社以至於羣祀仁以饗帝孝以饗親有德則崇之有功則報之焚胡神之廟絕淫祀之端此理之所以破姦

也祭祀不祈不麾蚤不樂葆大不善嘉事牲不及肥大薦不美多品祭不以數而煩不以疏而怠此之謂不以諂而生姦若乃人持齋戒家爲巫史戶立皇王之像日崇摸拜之儀而自以爲能事神是則諂之而已不已謬哉

祭墓辨

祭墓非古也古惟享廟之禮而無祭墓之文事鬼必於其所也喪事卽遠葬於野則遠之至矣於是反哭而虞則尸以像之主以依之卒哭而祔復几筵以安之禪而干祔於是乎廟以享之事亡如事

存也祭於墓是遠其親矣爲人子者胡爲而忍遠其親也哉古者君子去國則哭於墓反國不哭展墓而入若宗子去在他國庶子無爵而居則望墓而爲壇以時祭若宗子死告於墓而後祭於家庶人無廟者則祭於寢而今之祭於墓也其比於失位去國歟其宗子之去國歟葬也者藏也所以藏親之體魄也若魂氣則無不之魂氣則無不之故假廟以萃之祭不於廟而於墓不務萃其神而求之體魄非其所矣孟子曰東郭墠間之祭者墠間之祭蓋於孟子時始見之其後世之末失乎然則

墓其如遺可乎曰祭必於寢若墓則及時展之以識不忘可也古人望圯壟而思哀今則藉拜墓爲名而子孫共酣飲乎圯壟之上更如之何其可也

西學辨

從來異端之肇必挾一勝人之私唯挾一勝人之私斯其說以曠誕而無稽而其禍乃日流於不息矣老氏之說求勝於吾儒者也求勝於吾儒故吾儒言禮而彼謂禮爲亂之首吾儒言仁義而彼謂仁義由道德之亡此其等而上之皆所以彈壓夫儒而虛無之害之所以滋蔓而日逞也釋氏之說

又求勝於吾儒而并勝老氏者也求勝於老氏故
老氏以事物爲粗迹而彼則曰萬事門中不舍一
法老氏以空虛爲妙用而彼則曰實地理際不惹
一塵此其益鑿而深之錯綜而顛倒之又皆所以
彈壓夫老氏而寂滅之害之所以橫流而莫遏也
嗚呼佛老之爲吾害也亦旣甚我禮義蕩我防閑
棄我人倫戕我天性惑我才智之士煽我愚昧之
民以玷兩漢以禍六朝歷唐宋元明而至於今未
已使我董子黜之而不可絕韓子闢之而不肯屈
周程張朱賢聖繼作殫力以攘之而未能熄而聖

人之道幾於蕩然無有復存道步之艱其將何所
底歟乃亡何而又有所謂西學者興起於其間其
人善以機巧之智濟其夸大之言又神其說於天
而求以彈壓乎釋老故其於仙佛之徒則指之爲
魔鬼於釋老之說則唾之爲謬妄此亦似不惑於
岐途而確然得所宗主者故吾儒曰帝者天之主
宰而彼則曰有天主焉吾儒曰易有太極是生兩
儀而彼則曰天主實生天地乃吾儒曰太極而彼
則謂之元質吾儒曰五行而彼則謂之四元吾儒
言格致而彼則又曰空中格致則又事事依倣而

更別異於吾儒其遠探乎天地之始則有類乎列
禦寇之談其窮致乎天地之高遠而謂地毯九萬
里上下四旁皆人物所處則有類乎鄒衍劉安之
言其爲教也生不祭祀死棄棺槨則有類於墨翟
之爲男不再娶女不再婚則有類乎尾生之信蓋
旣求勝乎釋老又欲求勝於吾儒而於是天下之
好異者遂亦羣然附之且曰是其學有能盡吾儒
之所未盡也是其言有能闡吾儒之所未及也究
之指地獄爲魔府則又惑於鬼神書十字以避災
則又趨於符籙是其術亦有終窮而淺陋易見矣

嗚呼佛老之爲害於人心至今未已而西洋之人
又倡異說以廁於中原道步之艱其竟將何所底
歟夫天何主乎主之以理而已六合之外聖人存
而不論必曰天地之始何以始天地之終何所終
此亦必無可據之道也今其言曰有天主焉實生
天地以生人物而天主復託生於人以垂世立教
故能從天主之教者則其道至尊而莫爲之等是
其挾好勝之心而巧其辭以惑世甚彰彰也夫必
欲求其始則必有始其始者有始其始者則尤必
有始其始之始者天地始也天主始其始也而天

主之始復誰其始之如或解之曰天主固自然而始也則天主可謂之自然而始而天地何不可謂自然而始而何必云天主苟天地非自然而始而始於天主則天主亦必非自然而始而又必有始夫天主者而何以云天主至其謂天主乃託生於人以垂世立教則又竊佛氏之唾餘而妄誕爲尤甚者顧天下之人亦有附其教者何也曰附其異也非附其異也附其異而似也異而似者似而非也不似不足以眩人不異不足以勝人不似而非不足以害道嗚呼道步之艱吾不知其將何所底

也曰邵子之元會運世不亦且欲求以探索乎天地之始終歟曰邵子數而主之以理其所推天地始終要不過一陰一陽循環無端之意非別有始終乎天地者也而安可同年語也

觀物上篇

雁謂雞曰子知予之將搏子而不知人之烹子以故避吾而依人也夫人之朝夕而飼子爲塹爲櫟以棲子豈其中心愛子哉亦將以利其鬻也云爾與其調酸鹹而葬於人腹方膏沐而實予也其與能幾何何子之不智乎且以犬牛之勞而不可恃

也其可鏡矣雞對曰嗚呼何言之謬予何能自擇食其食爲有德予且非人則不得食莫非人則不得棲予將夜宿而見僂於狐狸日則禿羽毛而適子之欲則予須臾之寄也何莫非上其首者之德也昔子胥勞而浮於江韓彭勤而不免於醢鬼侯鄂侯忠而待脯申生茅焦仁而就烹豈智之不足哉分固然耳抑亦食其食故也是故以犬之守而死以牛之勞而死以馬之服而死其餘山林藪澤之產人尚或羅而致之而奚獨於吾然使吾而非人吾之類絕久矣尚安得縣縣自翼其子而羣遊

乎而子亦安所耿耿然而朶其顙乎此吾之所以
葬於人腹而不敢憾也而子何德邪其以予而售
其諛歟子知自處矣子無望矣其可無譏矣雁曰
嘻愚甚矣彼亦知人事而未聞天道也夫夫萬物
之生久矣謂必依於人而後迺食也將造物其何
功乎故蜻蜒啄乎蚊蠅鴻鴈饜乎藪荅蟹蜚飲露
而鶯鷺飽乎魚蛇夫固各有其祿矣今何不遊於
莽蒼之野憩乎無人之墟夜藏乎蓬蒿晝遊於陸
阜稊稗之實蚯蚓之肉南山之黍北澤之蔬其可
盡歟且鱗者不盡乎蠓獺走者不絕乎豺狼彼鷗

鳶鷂鳩之屬寧因吾而殄其類也天道然矣吾何
諉於彼哉啄粟非吾慮矣吾竊爲彼傷也鵠以告
雞雞曰嗚呼彼亦未聞聖人之功而侈言天道哉
天之生物也不勝其類而厥有恆性故飛者之不
可易而潛也潛者之不可易而走也猶畜於人者
之不能以處於野也天性然矣然無以適其性而
馴之其何能殖聖人者作能盡性以至於命而盡
物性以財成天地之道故飛走者之多字於春也
則春不火田潛游者之育於夏也則夏不網罟不
敗卵不覆巢不以數罟入洿池愛物之仁斯其至

焉夫是以至於上下草木鳥獸魚鼈咸若不然者
竭澤而漁之烈山而獮之物之生也寧無蹙乎且
夫天則不廢殺矣予其死於人之手也而人之不
能無斃也誰則爲之草木之生也春則向榮而秋
則就彫固亦天之道也彼知物之斃於物而不知
其斃於天知物之生於天而不知其生於聖人也
而尚哆譚天道哉抑吾之與人則異類矣彼固同
羽翬也而害爲賊我賊其類是不仁也用物而無
厭是不義也不知人不知天是不智也利口以亂
信也尚嘒嘒其不息也觀物子聞之曰不亦善乎

聖人致中和天地位焉萬物育焉彼以煦煦爲仁者又安能與知於此乎

觀物下篇

駁馬食虎虎食狸狸食雞雞食螂蛆螂蛆害蛇巴蛇吞鹿故曰小之黠大之害弱之肉強之食

騶牙讓於菟曰若何傷生傷生不仁於菟曰予知果子腹安知傷生且予性不茭芻若不傷生是自傷也傷生者且曰不仁自傷者其庸爲仁乎雞啄蟲豸匹喙羸蛤是其用物也日不知凡幾吾得一小獸可以饜矣且不能日必也吾之傷物亦云儉

矣不其仁哉不其仁哉

襍襍問於觀物子曰天子九鼎六牲獸禽皆六諸
侯七鼎六牲大夫五鼎三牲士三鼎特豚庶人伏
臘魚羊烹羔而以祭曰吉以嘏曰受福燕饗曰嘉
是故人之貴物之賤也人之吉物之凶也人之福
物之禍也人之慶物之菑也乃非時不殺者猶命
之曰仁不亦傷乎觀物子曰大物用小物大人用
小人天之道也聖人之事也而女何足以知之女
獨不見夫雞乎遊於蒼莽捫糞壤而俛啄得螻蟻
焉呼其羣得螻蛆焉或相攘而鬪其用物也日不

知凡幾然相呼也君子稱其仁相鬪也君子稱其勇何居乎以其先勦類而後異族也若夫用物固其所也是故鳶雁之粟也貓虎之梁也羸匹之粢也鮒鱧之糧也長蛟也蠛蠓也亦皆蟲以爲食而人之於物也乃曰非時不殺人之用物亦云儉矣不其仁哉不其仁哉

觀物子曰黃帝伐涿鹿舜伐三苗啓伐有扈湯放桀武王伐紂此數君子者而今命之曰仁是非能不戮一人不死一士也大人鬪小人勞大人功小人死小人肝腦塗地而大人帝矣食其德者死其

事沐其澤者服其勞士死於戰而不知怨且稱其仁焉分也情也天之道也小義害大義小仁害大仁婦人見人疾則涕泣漣洏折蓼莪其子繼迺相持而慟其自謂也亦仁義而已矣而夫子不欲效之使三王而不忍於戰也則是生其三軍而亂在天下也則是殘賊不取而毒天下於無窮也殺一人而安數人君子猶將爲之況一戰而安天下哉況忍於一時而燕於後世哉小大之辨惟聖人爲能察之而伯夷乃以暴非之不亦悲夫

襍襍曰敢聞君子何惡乎忍也觀物子曰所惡乎

忍者爲其用物而無厭也爲其欲之而不知節也爲其無輕重之衡也爲其不知類也爲其有己而不知恕也是故君無故不殺牛大夫無故不殺羊士無故不殺犬豕君子遠庖厨信其欲者命曰不仁如用物者若湯武之伐桀紂也則無惡其忍者矣湯武之伐桀紂也士死之而不知怨也如用物者皆死物而可無怨也則其於仁也亦庶幾矣子羔爲成宰也三鼎以祭陪鼎再焉禮食必刑牲燕食有脯醢然而啓蟄不殺方長不折或問之含氣一也忍於刑牲而仁於啓蟄於義何居曰子何

容心哉子何容心哉子漫假而爲虎子將食狸子漫假而爲狸則將食雞鼠漫假而爲雞鼠也將食蟲豸予用物也又安知不有用予者荷戈被以脩封疆肝腦將食地焉子其敢逃哉苟非事而殺之含氣皆生也子則何忍殺而用之彼亦分也子又何闕焉此之謂知物

渠石篇

渠石問於九峯子曰子胡不仕昔東門子業醫而杜門不出雖鄰人有病也未蒙其惠矣學古何爲今天下期子爲臯夔焉語曰能效廝養無爲高蹈

苟得棘實勝乎千藥之桃謂其不濟於用也而子胡不仕歟九峰子曰然哉吾守其石吾行其癖吾久臥於霞吾今其負鼎吾今其食牛吾將曳裾而遊於顯者之門矣渠石趨出門人罔榆奇進曰子胡仕哉詩曰彼求我則如不我得執我仇仇亦不我力語曰小人是望君子無枉今渠石之言小人之道也而夫子許之如子之言毋乃枉乎九峰子曰嘻是安在其爲吾哉負販之夫不忘市廛隱處之士不忘林泉吾也戴園而行抱方而處樂行憂違又烏知有所謂仕乎負鼎食牛爲渠子言之也

昔吳女那婉姸也者三十未嫁擁楹而歌曰桂邪
柱邪其誰與處邪楹邪楹邪斲於山者其女貞邪
其聲淫液若深長思也諄曰梅花梅花胡脂吾車
吉士吉士胡入吾室而儂其婦事猗鄰婦聞而謂
之曰子之歌其欲嫁邪何思之長也對曰然哉吾
欲得美而晳長而有力武而毅勤而不息力田而
多稼穡者吾欲得惠而直無文而不嗇敬恭而能
植者吾欲得和而不流守而不膠通而不淫立而
不倚大而不荒儉而不吝泰而不驕安而不佚慎
而不憚勇而不亂謙而不卑者以爲吾匹吾欲得

守禮不渝吾欲得納采問名納吉納徵請期無失其節奠鴈御輪三匝倡隨以偕歸吾得逮舅姑而致吾孝彼接以和我事以義相敬如賓而不流於昵古者女子十有五而笄二十而嫁予年及三十矣予殆思朝命而夕成也予心若熱中勿勿如有所失皇皇如不及日不安食而夜不安寐吾其能忘也歟哉而第難其人也嫂其謂之何哉鄰婦啐之曰如子言是終身不嫁也吾少飾吾色麗吾衣吾子之父悅吾而娶之吾亦何能擇哉人生世上如飈其忽以吾一日長乎爾也而今已五男二女

將及抱孫而子猶未嫁吾聞之曰貞女不行貞士
無名生斯世也爲斯世也皎皎何爲吳女憮然曰
寧折而死毋招而生雉也有志人其忽諸已往而
不可回者志也欲求而不可得者天也嫂往矣無
與吾事今渠子之言鄰婦之見也吾志之不自於
人也久矣而重以見訾於鄰婦也將焉用之

田子篇

田子方居魏魏成欲言於文侯而相之田子方往
見魏成曰竊聞魏成子之將殺予也敢來請其辜
魏成跣而納之曰先生其聞之誤邪成竊以先生

之高義也募爲隸而不得是以敢私介紹於君吾君將以國聽先生而柰何言成之將殺先生也子方對曰是則子之所爲將殺予也魏成蹙然曰先生是何言也曰子亦知琴瑟歟亦知狗之弗能不吠歟亦知烏之聲惡歟曰是皆知之曰烏能告人以禍忠之至也而惡其聲者從而彈之狗吠宵行嚴之至也爲盜者殺而醢之號鐘者太古之遺琴也鳴鈴者燕末工之巧筑也宋人兩得之乃日爲擊筑扣缶相和以鳴吹而破其號鐘以爨何則琴非正席不就非盥手不鳴而音又不足以悅人則

曷若擊筑是三事者有一於人皆足見殺而小人實兼之子何不聽其鳴噪於山林伏阜於里閭棄置於無何物之府以就朽腐而顧乃欲進之離宮范臺之苑寘之羣盜闕伺之交雜之瓦缶雷鳴秦箏競響之會其殺予也不越期日矣遂逃之以去

逢萌篇

逢萌往求卜於君平君平三問而不言事君平曰義歟志歟予觀大夫子之來也仰而太息俯而深思乃正其衣冠端其步履容若甚戚思若甚淵慮若甚廣憂若甚大夫非一世之有心人也歟哉茲

之三問而不言事也夫子殆其志也逢萌曰義則精之志則成之夫有我心皆何庸卜曰然則何卜之云曰竊有疑也仰觀於天惟德其昌胡禍福之倚伏而天道其渺茫胡亂之不一而命其靡常俯而維之何憂何懼經德不回非以干祿顧思置民物而不與視胞與爲秦越旣守璞以自藏亦與世而相絕飲許由之瓢而抱務光之石非不泮奐以優游而非吾心之所則若乃奠天下於泰山垂經綸於不易補天地之傾頽挽澆漓於穆沕欲堂陛以趨鏘以贊襄乎黼黻固有志而未逮亦嘗多

方以籌策乃孔孟尚不已於棲皇詎子求之可得
吁嗟乎士之涉世尚其磊磊落落皎若穠日蹇蹇
諤諤貞若松柏安能局促於轅下而垂首於臧獲
彼夫婦妾爲容穿窬苟祿占一善以揚名錄一藝
而爲僕尚沾沾之自喜終魚魚其鹿鹿烏足與有
無於天地亦以草木而同腐吁嗟乎寧不悲哉此
其爲志由勢阻義與時違進退俱難以自安未識
天心之何定而欲因先生卜之先生之所以三問
而未知所言者此也君平笑曰是恐非卜之所能
知也曰先生第爲卜萌以觀神意焉可也則曰諾

於是灼龜而契之兆廣輪以雨其繇曰膏之雪雪地爲澤霖霖霖霖濡我冠行匱匱放於大溟之壑君平曰此膠鬲魚鹽之占矣夫膏之雪雪者陰陽浹也霖霖我冠承天澤也放於大溟志大得也夫子勉之歟無憂不達逢萌曰求達也歟哉夫陽升而霽陰齊而雨雨濡斯慍大溟非所膏之雪雪則惟濫之故也霖霖我冠則元首其堪侮也行匱匱放於大溟是海濱其與處也且膠鬲何庸之有志之阻也何如自成義之違也何如自屏子其從此逝歟天其未可憑矣君平拊龜而謝曰夫子之志

云也予多此一卜矣

逝解

宇宙皆逝者也逝而不窮一陰一陽之道也故曰
天地之道貞觀者也日月之道貞明者也天下之
動貞夫一者也異哉蘇氏之言曰逝者如斯而未
嘗往蘇子若曰川流亘古斯逝也逝則晝夜如斯
也如斯夫逝而晝夜如斯則未逝也逝其往也而
亘古斯逝則未往也往不足以見天地未嘗往而
乃足以見天地逝者如斯而未嘗往也雖然川其
亘古斯逝也逝則晝夜如斯也如斯夫逝而晝夜

如斯得謂之非逝乎逝其往也而亘古斯逝得謂之非往乎天之運行也地之生成也日月之昭明也四時之迭更也山嶽之不騫不崩也萬物之雜然流形也何莫非往也不往不足以見天道惟往而乃足以見天道也蘇子若曰天運行而天如故也地生成而地如故也日月昭明四時迭更萬物流形而日月四時萬物如故也逝變者也如故不變者也不變者未嘗往也變者往也不變者未嘗往則變者亦未嘗往也故曰逝者如斯而未嘗往也雖然不變者體也變者用也不變者心也變者

天下之事也不變者萬物之本也變者天地之道也如曰往未嘗往也變未嘗變也然則生未嘗生也息未嘗息也爲未嘗爲也夫變而後成其不息往而後見其無盡故惟往乃見天道蘇子若曰不變者心也變者天下之事也不變者萬物之本也變者天地之道也故知其本焉則變不變不知其本不變將變今舉岸與舟月與行人則變非眞見矣見其往者不知其本者也且夫垂柳橫植之則生倒植之則生謂生之卽柳也然生之與柳則固有間矣是故生無生也息無息也往無往也爲無

爲也道無道也故曰逝者如斯而未嘗往也雖然
舟行岸迎人行月隨固也不識水之逝也其以舟
乎四時之往也其以人乎且變者道乎抑所以變
者道乎如曰變者道也則是正道也淫亦道也善
道也惡亦道也苟知本而已吾將倒行而逆施之
夫行之與本則有間矣雖爲未嘗爲也何則以知
本也然則何如曰循環無端陰陽無始氣化流行
與道爲體君子效之貴其不已日月東西相從而
不已是天道也不閉其久是天道也無爲而物成
是天道也已成而明是天道也道之體不可見卽

於逝見之故曰惟往乃見天道

物解

爲齊物之說者曰盈兩間者惟萬物矣物萬不同
同謂之物則泰山秋毫皆莫非大殤子彭祖皆莫
非年厲與西施皆莫非妍知覺運動皆莫非性含
氣戴首皆莫非生而孰從而別之大荒之外有偁
僮小童也者常玩二十四天地九於股掌之上如
轉圜焉若鷦螟則羣飛舞於蚊睫之際而蚊不驚
夫蚊之視鷦螟猶人之視蚊也安知鷦螟之自視
不且侈然大哉及彼蒼之視人則尾然亦鷦螟矣

彼夫人猶必執己之所謂大小者而大小之不猶
乎鷦螟之見乎蜉蝣以朝暮爲壽曾何歎乎百年
故曰齊也然泰山秋毫皆莫非大而大小分矣殤
子彭祖皆莫非年而脩短異矣厲與西施皆莫非
妍而姤醜別矣知覺運動皆莫非性而靈蠢殊矣
含氣戴首皆莫非生而或相倍蓰而無算矣鷦螟
之自視大矣然必不敢謂蚊之大爲非大於鷦螟
之大則必不敢謂人之大爲非大於蚊之大則必
不敢謂彼蒼之大爲非益大於人之大是故以益
大視大則大失其大及以小視大而大見以小視

大而大見以益大視小而大益見小大之無算如是而物之不齊也審矣是故人能泯乎物之見而不能泯乎大小之見能泯乎大小之見而不能泯乎蚊與鷦螟之見見以爲蚊而蚊之見以爲鷦螟而鷦螟之蚊與鷦螟則既有分矣是不欲有大小而大小終寓焉也不能泯乎蚊與鷦螟之見則不能泯乎人與彼蒼之見則益不能泯乎彼蒼與鷦螟之見卽是終不能泯乎大小之見不能泯乎大小之見則不能泯乎物之見不能泯乎物之見則不能泯乎己之見也而欲從而齊之夫齊之則烏

乎齊也爲齊物之說者曰大小分而賦形一也脩短異而爲年一也姁醜別而爲類一也靈蠢殊而爲性一也倍蓰無算而爲生所從來則無不一也一則胡爲屑屑而區分之但旣已一矣自不能已於言也旣已言矣自不能已於分也自一以言猶至於分況自分而分之分伊胡底然分者其迹而一者其倪倪之自然將一猶泯是故賦形一焉無問乎大小也終始一焉無問乎脩短也爲類一焉無問乎姁醜也靈蠢一焉無問乎靈蠢也爲生所從來未始有始焉無問乎倍蓰無算也庸知乎一

之不至於分則庸知乎分之不終歸於一乎庸知
一之不泯於無乎庸知人之馬馬也而馬之不但
馬人乎自無而有齊將不齊以無觀有不齊皆齊
以一一物之不一不若以不一一物之不一也以
齊齊物之不齊不若以不齊齊物之不齊也不一
一也不齊齊也齊一而泯其迹故曰齊也然賦形
一矣而既有大小則形之微著異施也始終一矣
而既有脩短則數之多寡異量也爲顏一矣而既有
有效醜則質之美慝異側也爲性一矣而既有靈
蠢則氣之明蔽異材也爲生所從來一矣而既已

倍蓰無算則未始有始之始必有所以異之者存
也是故天尊地卑上下定矣卑高以陳貴賤位矣
動靜有常小大殊矣方以類聚物以羣分則性命
不同在天成象在地成形而欲從而一之夫一之
則烏乎一也是故物有其同也者有其不同也者
有同而不同也者有不同而同也者有不同則同
之而終不同也者有同則不同之而卒無不同也
者其同也者無不同者也無不同則不同之而卒
無不同而烏事乎齊之其不同也者不可同者也
不可同則同之而終不同而又烏乎其齊之故異

者其迹卽不一者其倪倪之自然且不知紀在無
言無在有言有旣顯於有安得求無執一以惡不
一不若滂不一以知一也見齊而強不齊不若由
不齊而各齊也一至不一矣齊至不齊矣而欲從
而齊之夫齊之則烏乎齊也

留餘解

天有餘度地有餘步人之所履不過容足而行欲
康莊居欲廣廈亦欲以留餘也然此盈則彼虧彼
舒則此促與其有餘於此而此外已索然無餘地
孰若留有餘以還造物而彼此皆綽然有餘裕哉

家芳泉兄於後園隙地斲小軒而額之曰留餘示約也言不敢盡也法天之道因地之宜小軒之外所餘多矣是豈惟裕於人亦足以裕於己

牡丹解

牡丹之爲花也其香濃其色豔其爲態也嬌嬈而掩翳非草非木華而不實以媚於人若似於婦人女子焉然天下羣被以富貴之名崇以花王之號歷唐宋以至於今詩人歌詠不絕豈天下之所稱述爲富貴者其皆爲婦人女子歟不可解也雖然香不濃何以謂之天香色不豔何以謂之國色不

媚於人人誰復愛之天下固未有不濃不豔不媚
於人而能成其爲富貴者則其謂之富貴也宜也
而或者爲之說曰牡丹則何庸富貴人亦自富貴
牡丹耳故植之必於金谷名園庇之必以香亭寶
檻姚黃旣進於前魏紫復誇於後夫亦誠以人重
也夫是以富貴之也若然則是花之富貴非花之
富貴而人實富貴之也人之所富貴者人亦得而
貧賤之設也委之於草莽之外棄之乎蕪穢之區
而任夫爲樵夫牧豎之斬艾踐踏焉雖貧賤之也
不亦可乎且是花初非有歷久之操者畜之期年

爛熳者不過數日一經風雨便成狼狽人亦何爲而寶之愛之以爲富貴而爭羨之不可解也然正唯其非耐久之操者夫是以必寶之愛之以爲富貴而爭羨之蓋天下之富貴者本皆非耐久者耳如其不然則何不以菊之傲蓮之淨梅之孤高者爲富貴而獨以牡丹爲抑嘗聞之昔武曌遊於上林冬月百花皆放而牡丹獨否因是貶之洛陽夫其不肯媚賊后以求榮也則猶有羞惡之心存焉者有羞惡之心存焉而牡丹之富貴亦幾詘矣嗟乎義利之不容以並居也有如是夫

參龍解

天下惟無形者神而龍有形者也然龍之爲物也
能大能小或潛或見龍不其神矣哉神則宜獨往
獨來莫之天閼又胡爲得而畜之且醢而食之也
或曰有欲故也神則宜不欲矣欲則宜不神矣伺
其欲而參之且醢而食之若犬羊焉龍烏在其神
也是蓋無形者造化之神也無欲者聖人之神也
龍則何能及此龍亦得造化之神以神其形而非
能神其心是以能大能小或潛或見而不能免人
之醢也君子亦神其所神而已取象於易爲章於

集
卷之六
三
袞君子且神其所神焉龍固不失爲神物也若人
之神其心者則又有在矣夫

銘箴

硯銘

硯也而塵侵之心也而欲誘之硯至堅也而猶畏
乎塵之侵而況於心乎

牖銘

牖虛而明生心虛而義精明生之至噲噲其正精
義之至盡心知性何以守之曰誠與敬無蔽無壅
慎獨主靜無傲從康睿思作聖

鏡銘

順事之至因物之情毋意毋滯毋將毋迎勿寂以
守勿察以明於義以爲衡

几銘

葆於中得吾正一於靜見吾性

座右銘

百相欺也而此心不可欺百相掩也而鬼神不容
掩

書架銘

讀欲博服欲約博以廣吾識約以踐吾實日用飲

食道之端也禮樂兵農道之具也詩書六藝道之
文也時行物生道之著也凡天下百工技藝方名
象數之學皆此道之支流而旁注者也草木昆蟲
芻蕘是詢人不得以我爲濫兩間之大仰觀俯察
人不得以我爲夸無得一以自足無涉獵以自多
無曰逕約將癖而入於王陸也無曰徒博以沈淪
於句讀也多學而識一貫之基也質疑問難聖人
之師也默會覃思造化之壺也精義入神安身之
本也半塗而廢者未及泉而棄井也日就月將吾
有事焉而勿正也豁然貫通睿思作聖也盡其心

者知其性也

書幌銘

失豈在多一事致瑕過豈在大一言敗德吾有一
言一行之善其庸可自許乎恐天下之善殆不可
勝許也吾有一言一行之失其庸可自恕乎恐吾
身之失將不可勝恕也夙興夜寐昧昧以思無易
由言駟不及舌弗慎厥德雖悔可追誰則阻吾胡
苟安而日與過俱也寧匪由予瑕脫然而莫能自
持也耿耿此心上帝甚神湛湛吾天實一旦精毋
曰無人而欺吾之心勿謂無知而慢吾之天造次

顛沛匪居匪暇矢吾口於三緘凜予行於六馬嚴
日監於幽居指旦明於牖下庶日夜有所持循而
吾過之日寡

帶銘

淑慎威儀養中制外必敬必敕視此衣帶

衣架銘

君子恥服其服而無其容恥有其容而無其辭恥
有其辭而無其德念茲三恥以敦吾素履無多讓
乎君子

書尺銘

聞人之善其可言者也聞人之過其不可言者也
律己之身其不可不嚴者也律人之身其不可過
嚴者也

琴銘

吾不知此心之何以一也吾不知此氣之何以平
也吾不知此身之何以靜正而耳目之何以聰明
也幸茲以往庶所謂良其背不獲其身行其庭不
見其人者乎於可以淑予之性情

劒銘

割其忿以自抑制割其慾以自一劒者撿也撿身惟

不及自勝者強視此爲則

篤學箴

至虛至靈者心心不可一刻使有所在尤不可一刻使無所在心有所在憧憧往來之心非心也心無所在槁木死灰之心無心也則何以治心曰勉彊學問多聞而擇多見而識是之謂博學非聖賢之書不敢讀非仁義之志不敢存是之謂篤志疑事無質直而勿有此之謂切問將聖賢所是便作目前師保聖賢所非便作切膚痛棒此之謂近思誠如是仁在其中外此而鬬靡誇多吾不知所學

何事

力行箴

聖人可學而至乎曰可曰何以至於聖人曰下學而上達死生有命非服煉所可強也富貴在天非心計所可營也勇力技藝有質以限之博聞多識有氣以域之然則所堪自盡以無多讓於人者惟此心此理而已此心此理之自盡天命不得而靳之氣質不得而固之人不得而阻之己不得而委之人奈何強求其所不可求而不力求其所可求所當求者歟謹小慎微聖人之基性安擇執殊途

集
卷之六
同歸母役役於當世而苟然以自欺公明儀曰文
王我師

弱箴

慢慢的三字耽閣了無限工夫何妨得三字長進
了無端罪惡愛體面三字消費了多少閒錢沒柰
何三字割舍了無邊至性

強箴

我不陵人人誰陵我我不讓人人誰讓我萬物一
體而我柰何獨私有我自勝者強自謙者光犯而
不校物我兩忘守此以爲常

儉箴

終日膏粱不知膏粱之味何如日食粗糲而偶然
其一嗜也終日綺羅不覺綺羅之麗何如日服布
衣而潔清以自飭也高宮美室不求此心之安何
如自治其心以優悠於天地也繁文厚賄以爲禮
而中之實者不存又何如效曝獻芹之亦足以將
吾誠意也慎乃儉德惟懷永圖庶可傳而可繼也
贊

關壯繆侯贊

天命人心之際難言哉君侯歆側於孫曹之間而

失足襄陽荊州顛沛功何如也所可其白者亦此
心耳顧當日以王佐之才而甘心臣虜負英雄之
質而委質江東者亦何復有人心而漢蜀卒夷於
三馬史冊且帝魏而僞劉則欲求卓犖於天命人
心之際百折而志不同如君侯者能幾人哉君侯
之廟食自當日已然然至今而逾盛矣是可見天
命靡常而人心不死大丈夫欲立芳名於千古誠
在此而不在彼也

竹林七賢贊

卓哉劉伶不聽婦言解醒五斗一醉十千

劉伶向秀

注莊平行天倪逍遙養生孰能過之

秀向

白眼步兵

不拘禮節至性尚存喪親嘔血

阮籍

小阮風流乘馬

如船醉眠水底與叔齊肩

阮咸

山濤雅量超乎當世

才識過人厥有奏事

山濤

王戎簡要持籌會計知行

亂邦豈曰非智

王戎

叔夜玉山矯然離羣量高識短

聞嘯蘇門

嵇康

梓潼君像贊

文昌六星實司爵祿惟神配之永綏多福何以福
我曰公無私業精於勤荒於嬉行成於思毀於隨
小子識之毋怠爾所學而徒奔競是爲

又

文昌者斗魁戴匡六星也而梓潼君配之其申呂
之自嶽降歟其傳說之騎箕尾歟我不敢知曰其
司仕籍之柄我不敢知曰其有陰騭之文我所知
者惟百行之莫先於一孝而百業之必本於脩身
惟以是承天之祐或者其無戾於文昌司命之神
魁星像贊

螭者其貌妍者其文瘠者其形腴者其神如椽彩
筆一瀉天真踢去斗筭之輩而獨立乎青雲以告
天下之持藻鑑者曰無徒以貌取人

孫真人贊

回生起死醫之良也醫龍醫虎技之長也著方遺
後仁之顯也遜世無悶智之藏也膽欲大而心欲
小智欲圓而行欲方技也而進乎道矣不然者自
岐伯雷公以至於蒼公仲景其業非不精矣而何
以稱乎藥王

鐘馗贊

馗也不颺抑鬱其志死於帝堦靈以志聚方帝之
疾爲驅其祟雖杳杳之微靈實浩然之正氣顧崇
之在內者莫如太真而崇之在外者莫如揚李馗

集
卷之九
三
也何不驅之而聽唐室之傾危以至於流離瑣尾
君子謂尫也之才蓋不足以制人而惟足以制鬼

五福圖贊

福錫自天嚮用惟人自求多福視此爲珍

又

惟其仁所以壽惟其勤所以富

又叶扶反

與世無爭而

曷不康寧好德以盡性考終以立命此所謂五福
者而斯圖其有合乎曰惟求福不同斯以受天之
慶

雲臺贊

余於東漢之興而知名世之難也雲臺諸子勲名
赫濯千古顧吳漢入蜀殺戮甚焉耿弇屠城七十
功則大矣王者之師安在哉鄧禹之知人寇恂之
得民馮異之不伐祭遵之好禮庶可予乎而一時
圖讖術數之學無俚一勇之夫皆得以攀鱗附翼
而依末光詩有之乘時功易立處下事少成甚矣
名世之難也

五老圖贊

偉哉其貌乎曠哉其神乎斯人其何許人也其五
氣之精邪胡爲而寓形於老人其巢由之侶邪胡

爲而踪跡之不恆知河圖之將至相唱和於河濱
或言終而不見爲帝德之符徵噫嘻其果何許人
也意亦後人之附會而非其真也則亦姑置之不
議不論而無爲神其說以駭斯民之聽聞余第愛
斯圖之入妙而因爲備其說於斯文

商山四皓贊

漢高慢罵四子之不出宜也乃不出於漢高而出
於太子何也說者謂此留侯使人託之而四子終
未嘗出也然乎否乎使一出而可以安人之國家
四子亦何爲而不出

劉海贊

劉氏之先有豢龍氏者海豈其苗裔邪何以不豢龍而豢蟾也聞之蟾能吐雲氣蝕太陰則蟾其非凡物矣意者後王德薄無以致遠物而劉氏既失其官則姑以其術小試於蟾歟其以錢戲何曰凡致物者必因其所嗜蓋蟾之性嗜錢夫因以是致之亦猶夫豢龍之術也噫蟾神物也而嗜錢錢誠可以通神矣如其有錢則亦何不可致而何獨騁乎三足之蟾

余司徒讀論勿藥跋

和平之福莫大於讀書讀書之娛莫大於默會之心而實見之事不求勝人而祇求自勝不驚於新奇可喜之說而求以自信其心若是者雖未能驟幾聖人吾知其無慚性命矣道學之岐也一妄人倡之數妄人起而和之而天下無識之子鷺之若狂以謂聖人復作此不求自勝而務以勝先儒不求自信其心而信於新奇可喜之說也孔子不云乎古者民有三疾今也或是之亡也夫自孔孟而下漢唐諸儒若董若韓若宋之歐陽司馬夫亦豈盡能純而不失爲儒者何則不求勝人而有以自

勝不驚於新奇可喜而有以自信於心其未純者疾也其不失爲儒者讀聖人之書而有以默會於心求以實見之事也有明當隆萬間亦吾儒之陋會矣借孔孟遺言以自文其偏私之學術驚之若狂者徧天下矣不有學道篤信之君子亦安能以和平自安而不加之妄藥乎愚讀余司徒讀論勿藥一書而心爲嚮往也

余司徒讀史隨筆跋

學術辨於談經事功覘於論史以讀經之心讀史史亦經也先儒有言曰六經載道之文春秋聖人

之用用之而事功出矣春秋獨非史哉顧用之非
易言矣以拒父是衛輒以報讎大齊襄於經義背
謬已甚而當時資其能斷上蔡舉史成篇程子譏
其玩物喪志而程子觀史一字不遺何者其有用
無用異其用心內外殊也論史言人人殊要以觀
其經世處今之世論古之人其實學可徵焉其用
心可見焉解經且不妨不同況論史乎明司徒理
源余公讀史隨筆一編公之心得也論不必瑰琦
周於事勢所見不必奇特皆可用之當時事按其
實不爲縱橫之辭理根於經不爲背謬之解惜乎

其未罄於用也使當時授之國是事功豈可測哉
公往矣而其言存閱是編者其必當有以得公之
學術而想見公之事功慎無以文辭視之而自流
於玩物喪志亦無庸別樹之幟而以意見不同爭
自是也

余冢宰古方略跋

大冢宰少原余公輯古方略凡古今權謀形勢之
說與夫守戰攻取之事無不具焉然非公之略古
之略也亦非兵家之言圖治之言也以古之略爲
公之略而公之略見矣以圖治之言爲兵家之言

而公之於兵亦可見矣夫學古所以致用而用之則存乎人公輯古人方略公未嘗自立一言何以見公之略且明季至懷宗時時事幾不可問當時之當職任事者學古豈盡無人顧中原百孔千創四竟攘膚及骨事事措置乖方善談兵者汔無一濟豈明於論古而迷於當局歟抑古今事變無恆往迹散於方冊得此遺彼不能遍識故無以綜攬其方以精爲決擇歟抑或用材之不當事權之不專則雖有偉略長才亦困於無以自展其能而淪胥以敗歟又或者天之所覆非人事所能挽邪噫

愚讀古方略而益不勝有感矣公悼夫措置之乖
方而平日之自負曰能者皆自迷於當局也又懼
夫方策所傳讀古者不能遍觀悉識則無以綜攬
其方而精爲決擇也又有見於選材之不當事權
之不專使雖有偉略長才亦因於無以自展其能
而淪胥以敗也爰輯是書分門彙敘用以上諷天
子下勗臣工俾知所鏡而自擇焉以時宣布之天
意不敢知人謀當自茲公忠之至也公未嘗自立
一言而公之言盡矣公之略彰矣公悼時事而輯
是書而是書無救於明然制治保邦當機馭變者

寧不於是書知所法焉崑山張爾公兄弟又從事此書而參論之間以發明公旨是亦惓惓之志也

余淡菴寫心集跋

士躬行耳而有不能已於言者言卽其行張子所謂吾學旣得於心則脩其辭命辭命無失然後斷事斷事無差吾乃沛然亦修辭立誠之業也脩辭者衆矣而誠之立與不立則惡乎知之曰於辭知之大官之嚮人人美之而嘗之者誰則耳食耳滋味何如也立誠之辭談虎色變夫冉牛閔子顏淵豈務於言而善言德行者身有之故言之親切而

有味也淡菴余先生寫心集上下二篇約三萬餘言大要以克去己私推心及人爲主又詳於治生敎家及鄉閭排難解紛引爲己任不欲徒作自了漢其痛自刻厲之志蓋躍然於字裏行間矣夫豈以空言市者罕及性命蓋性與天道孔子且罕言之庸行之常下學上達性天宜自得也思孟始詳言性漢唐儒者譟陋漸流於異周程張朱乃起而力闡其源此皆其時爲有大不得已焉者明季闡陸學之宗王湛說興至山農卓吾而蕩檢踰閑無所不至此無他高言性命不務躬行期以立言欺

人之爲禍故至此也。關陸王者明儒亦多有其人而莫詳於東莞陳氏學部通辨一書。先生所服膺不失則性命之真先生蓋擇之明矣。所以罕言者得非以庸行之常下學上達故深監高言之失而矯以實地工夫歟。其或數言及於本源則亦卓然不惑其有過者則疑於強制之勞而要其躬行可識矣。予故心嚮往之。謂此集可以繼讀書居敬二錄之後云。

雙池文集卷之九

終